

魏

書

三七

列傳第八十三

魏書九十五

匈奴劉聰

羯胡石勒

鐵弗劉虎

徒何慕容廆

臨渭氏符健

羌姚萇

略陽氏呂光

夫帝皇者配德兩儀家有四海所謂天無二日
土無二王者也三代以往守在海外秦吞列國
漢并天下逮桓靈失政九州瓦裂曹武削平寇
難魏文奄有中原於是僞孫假命於江吳僭劉

盜名於岷蜀何則戎方椎髻之帥夷俗斷髮之
魁世崇凶德罕聞王道扇以跋扈忻從放命加
以中州避地華士違讎思託號令之聲念邀風
塵之際因虞候隙仍相君長偷名竊位胥息一
隅至乃指言井絡假上帝之祉妄說黃旗玄人
君之氣論土不出江漢語地僅接襄斜而謂握
皇符秉帝籍三分鼎立比蹤王者溺人必笑其
在茲乎若是鱉靈可擬於周王夫差容比於漢
祖尉他定黃屋之尊子陽成綰璽之貴豈其然

哉及鍾會將之威士治偏師之勢而使驃車
西至侯蓋北首天人弗許斷可知焉晉年不永
時逢喪亂異類羣飛姦凶角逐內難興於戚屬
外禍結於藩維劉淵一唱石勒繼響二帝沈淪
兩都傾覆徒何仍釁氏羌襲梗夷楚喧詬於淮
淮胡虜叛換於瓜涼兼有張赫山河之間顧恃
遼海之曲各言應曆數人謂遷圖鼎或更相吞
噬迭爲驅除或狼戾未馴俟我斧鉞太祖奮風
霜於參合鼓雷電於中山黃河以北靡然歸順

矣世祖叡略潛舉靈武獨斷以夫僭僞未夷九
域尚阻慨然有混一之志既而戎車歲駕神兵
四出全國克敵伐罪弔民遂使專制令擅威福
者西自流沙東極滄海莫不授館於東門懸首
於北闕矣唯夫窮髮遺虜未拔根株徼垂殘狡
尚餘栽蘖而北踰翰漠折其肩髀南極江湖抽
其腸胃雖骸骨僅存脂膏咸盡視息纔舉魄
魄久遊高祖聖畝時乘遷居改作日轉雲移風
行電掃辯髮之渠非逃則附卉服之長琛責繼

入猶以侍子不至取亂乘機五牛一指六師騁
路馘其武臣驍帥傾其湯池石城向使時無穀
塘之禍民無鼎湖之思北可焚穹廬收服匿削
弓弓之左衽苑龍荒以牧馬南則巢蠹鼴暴鯨
覲變水處之文身化鳥言於人俗矣尋以壽春
內款華陽稽服蕞彼江陰憂於繫頸肅宗以沖
年踐祚俄則母后當陽務崇寬政取和朝野置
荒遐於度外譬蠻夷於雞肋而黠狄淪胥種落
離貳虜帥飄然窮而歸我矜其眼目愍厥顛亡

反之於故庭復之以保塞魏道將虧禍出權幸
事僻於中民驚於外疆場崩騰藩籬傾駭陰朔
委命之倫雲蒸霧合上失其道下極其難政亂
如風草師亡猶彈丸數年閒中區殄悴而江
渭巨狡窺覲上國蛇虺肆毒竊我邊鄙旣委相
率馬首南向白山瀍水狐鼠羣遊魏德雖衰天
命未改援墜扶危齊武電發屈身宰世大濟橫
流和戎略遠用謀急病輶軒四指喻以德音余
乃舟車接次駝驢銜星烽柝不警尉候空設而

水鄉大猾好利忘信納我逋叛共爲舉斧遂有
寒山之戰渦陽闕二字糺合僉楚覆其巢穴衍以

餒卒綱實鳩死獯虜那壞尋亦殲殲自二百許
年僭盜多矣天道人事卒有歸焉猶衆星環於
斗極百川之赴溟海今揔其僭偽列於國籍俾
後之好事知僭盜之終始焉

匈奴劉聰字玄明一名載冒頓之後也漢高祖
以宗女妻冒頓故其子孫以母姓爲氏祖豹爲
左賢王及魏分匈奴之衆爲五部以豹爲左部

帥豹雖分屬五部然皆家于晉陽汾澗之濱父
淵形容偉壯膂力過人晉初爲任子在洛陽豹
卒淵代之後改帥爲都尉以淵爲北部都尉楊
駿輔政以淵爲建威將軍五部大都督封漢光
鄉侯後坐部民叛出塞免官永寧初成都王潁
表淵行寧朔將軍監五部軍事及齊王冏長沙
王乂與潁等自相誅滅北部都督劉宣等竊議
反叛謀推淵爲大單于時淵在鄴乃使呼延攸
以此謀告之淵請歸會葬潁不許潁爲皇太子弟

以淵爲太弟屯騎校尉晉惠帝之伐潁也以淵爲輔國將軍都督北城守事及惠帝敗以淵爲冠軍將軍封盧奴伯旣而并州刺史司馬騰幽州刺史王浚起兵伐潁潁師戰敗淵謂潁曰今二鎮跋扈衆踰十万恐非宿衛及近郡士民所能禦之淵當爲殿下還說五部鳩合義衆以赴國難潁悅拜淵爲北單于參丞相軍事淵至左國城劉宣等上大單于之號二旬之間衆便五万都於離石淵謂宣等曰帝王豈有常哉當上

爲漢高下爲魏武然晉人未必同我漢有天下
世長恩德結於民心吾又漢氏之甥約爲兄弟
兄亡弟紹不亦可乎今且可稱漢追尊後主以
懷民望乃遷於左國城自稱漢王置百官年號
元熙追尊劉禪爲孝懷皇帝攻擊郡縣桓帝十
一年晉并州刺史司馬騰來乞師桓帝親率方
騎救騰斬淵將綦母豚淵南走蒲子語在序紀
晉光熙元年淵進據河東剋平陽蒲坂遂都平
陽晉永嘉年淵稱帝年號永鳳後汾水中得

王璽文曰有新保之蓋王莽之璽也得者因增
淵海光三字而獻之淵以爲已瑞號年爲河瑞
以聰爲大司馬大單于錄尚書事置單于臺於
平陽西淵死子和僭立聰即和第四弟也殺和
而自立聰緩臂善射彎弓三百斤晉新興太守
郭頤辟爲主簿任以郡事舉良將爲驍騎別部
司馬齊王固以爲國中尉出爲左部司馬尋遷
右部尉太宰河間王顥表爲赤沙中郎將以淵
在鄴懼爲成都王穎所害亡奔穎穎甚悅拜右

積弩將軍參前鋒戰事隨還左國淵稱大號拜
大司馬封楚王及僭位年號光興聰遣王彌劉
曜攻陷洛陽執晉懷帝改年爲嘉平聰於是憍
奢淫暴殺戮無已誅翦公卿旬日相繼納其太
保劉殷二女爲左右貴嬪又納殷孫女四人爲
貴人六劉之寵傾於後宮聰希復出外事皆中
黃門納奏左貴嬪決之其都水使者襄陵王攄
以魚蟹不供將作大匠望都公斬陵以營作遲
晚並斬於東市聰遊獵無度晨出暮歸觀魚於

汾以燭繼晝其弟乂及子粲輿櫬切諫聰怒曰
吾豈桀紂幽厲乎而汝等生來哭人也先是劉
琨來告難穆帝親率大衆令長子六脩擊粲等
大破之語在序紀聰與羣臣飲讌逼晉帝行酒
晉光祿大夫庾珉等謀以平陽應劉琨於是害
晉帝誅珉等改嘉平爲建元平陽地震聰崇明
觀陷爲池水赤如血赤氣至天有赤龍奮迅而
去流星起于牽牛入紫微龍形委蛇其光照地
落於平陽北十里視之則肉長三十步廣二十

七步臭達於平陽肉旁常有哭聲晝夜不止聰
惡之劉后產一蛇一虎各害人而走尋之不得
頌之見在墮肉之旁聰遣劉曜攻陷長安執晉
愍帝改建元爲麟嘉其武庫陷入地一丈五尺
聰自去冬至是遂不受朝賀立市於後庭與宮
人譙戲積日不醒立上皇后樊氏樊氏是聰張
后之侍婢也時稱后者四人佩皇后璽綬者七
人阿諛日進貨賄公行後宮賞賜動至千万有
豕著進賢冠大冠武弁帶綬並昇聰座俄而鬪

死宿衛之人無見入者平文二年聰死

子粲襲位號年漢昌粲荒耽酒色遊蕩後庭軍國之事決其大將軍靳準準勒兵誅粲劉氏男女無少長皆殺之準自號漢王置百官尋爲靳明所殺衆降淵族子曜

曜字永明少孤見養於淵頗知書計志性不恒拳勇有膂力鐵厚一寸射而洞之坐事當誅亡匿朝鮮客爲縣卒會赦得還聰之末年位至相國鎮長安靳準之誅粲也曜來赴之次於赤壁

遂僭尊號改年光初斬明旣降於曜曜還都長
安自稱大趙曜西通張駿南服仇池窮兵極武
無復寧歲又發六百万功營其父及妻二塚下
洞三泉上崇百尺積石爲基周回二里發掘古
塚以千百數迫督役徒繼以脂燭百姓嘵哭盈
於道路又更增九十尺冢前石人有聲言愾封
其子肖爲南陽王以漢陽十三郡爲國立單于
臺於渭城置左右賢王已下皆以雜種爲之曜
得黑兔改年爲太和石虎伐曜曜擊破之遂攻